

## REVISTA SITUASAUN – JULLU 2016

### ASUNTU NE'EBÉ PRESIZA TAU ATENSAUN

- ▶ **Insidente Liga ba Asuntu Rai Tun Liu iha Jullu, Maibé Insidente Liga ho Tempu Bailoro Hatudu Sa'e;**
- ▶ **Ema Deskoñesidu Uza Rama Ambon Hodi Asalta Ema, Sai Nafatin Preokupasaun ba Komunitade iha Kapital Dili.**

#### INSIDENTE LIGA BA ASUNTU RAI TUN LIU IHA JULLU, MAIBÉ INSIDENTE LIGA HO TEMPUS BAILORO HATUDU SA'E

Belun ho nia Sistema Atensaun no Responde Sedu (AtReS) iha fulan Jullu 2016 rekolla insidente violénsia hamutuk 118 no husi número ne'e, iha insidente 7 de'it mak liga ba asuntu rai. Baibain, insidente liga ba asuntu rai kada fulan aas liu husi número ne'e ho número *rata-rata* (average) insidente 15.5 kada fulan (average ka *rata-rata* ne'e atu dehan número husi total insidente iha fulan 12 nia laran depois fahe ba 12, husi Jullu 2015 too Jullu 2016). Realidade oin seluk iha fulan Jullu, insidente liga ba rai tun tanba bailoro no komunitade la fokus ba sira nia toos-natar hanesan realidade tuir mai:

- **Insidente Mosu iha Serimónia Kultura.** Tempus bailoro, komunitade Timor-Leste maioria agrikultura seidauk fila fali ba sira nia toos-natar tanba udan seidauk monu rai. Tempus bailoro mós tempus komunitade agrikultura prienxe sira nia tempus ho sebra serimónia kultura oioin. Tuir dadus AtReS, número insidente liga ba asuntu serimónia kulturál hamutuk 9 iha fulan Jullu kompara ho número *rata-rata* (average) 7.2 kada fulan;
- **Insidente Mosu Tanba Hemu Tua Lanu.** Tama ba tempus bailoro, komunitade agrikultura seidauk fila ba sira nia toos-natar no iha tempus hanesan ne'e komunitade prienxe sira nia tempus hodi tuur hamutuk hemu tua. Hemu tua ka álcool sai hanesan konsume prinsipál iha serimónia kultura sira. Tuir dadus AtReS, insidente violénsia ne'ebé mosu tanba hemu tua no lanu hamutuk insidente 30, no número ne'e konsidera aas kompara ho número *rata-rata* (average) insidente 25.6 kada fulan;

Totál Insidente Violénsia iha Jullu 2016	
Munisipi	Insidente
Aileu	3
Ainaru	8
Baukau	16
Bobonaru	8
Covalima	1
Dili	43
Ermera	10
Lautein	2
Likisá	7
Manatutu	4
Manufahi	3
Oekusi	5
Vikeké	8
<b>Totál</b>	<b>118</b>

- **Tempus Bailoro Hamosu Insidente Tanba Disputa Bee Moos.** Husi dadus AtReS hatudu mós katak insidente liga ho bee moos iha tinan 2015 komesa sa'e iha fulan Jullu no maka'as liu akontese iha fulan Setembru. Iha tinan ida ne'e akontese atu hanesan. Iha fulan Juñu akontese insidente 2 no iha fulan Jullu mós iha insidente 2 mak akontese. Insidente 2 liga ho disputa bee moos iha fulan Jullu hanesan akontese iha Aldeia Poelete, Suku Asulau-Sare, Postu Administrativu Hatolia, Ermera. Iha akontesimentu ne'e, Katuas ida hakilar xefe suku iha serimónia entrega Postu Saúde hodi dehan, xefe suku mak uza bee moos barak liu halo komunitade balun la hetan bee moos liuliu ba Postu Saúde. Insidente atu hanesan mós akontese iha Aldeia Sanane, Suku Costa, Postu Administrativu Pante Makassar, ne'ebé família ida kuru hela bee moos, maibé família ida seluk ezije hodi fó lailais bee ba sira, maibé família ida kuru hela bee ne'e la fó tanba masa seidauk nakonu hotu. To'o ikus akontese hakilar malu no tarata malu.


#### EMA DESKOÑESIDU UZA RAMA AMBON HODI ASALTA EMA, SAI NAFATIN PREOKUPASAUN KOMUNITADE IHA KAPITAL DILI

Sistema AtReS iha fulan Jullu nafatin rekolla insidente violénsia hamutuk 3 husi total 118 liga ho asalta rama ambon. Tuir dadus monitorizasaun AtReS, insidente mosu ho ataka uza rama ambon iha Dili laran komesa ona iha fulan Feveiru tinan 2016. Iha Feveiru akontese insidente 7 liga ho rama ambon, iha Marsu iha insidente 3, iha Abril iha insidente 2, iha Juñu iha insidente 5 no laiha insidente rama ambon iha fulan Maiu.


Insidente liga ho rama ambon hamutuk 3 iha fulan Jullu hanesan insidente ida akontese iha Ponte Maloa, Bairro-Pite iha loran 20 Jullu oras 8.36 kalan. Ema deskoñesidu na'in 2 mai ho motorizada husi diresaun Tuanalanan no hana joven ida kona parte hirus matan to'o kanek grave. Akontese mós iha Aldeia Lisbutak, Suku Bairro-Pite iha loran 22 Jullu oras 5.45 lokraik. Labarik menór idade halimar hana malu ho rama ambon to'o ikus kona labarik ida iha nia kakorok to'o kanek grave no lori ba ospital. Insidente rama ambon ida seluk akontese iha Aldeia Aimetin Laran, Delta, Suku Comoro iha 14 Jullu. Iha oras kuaze 9.30 kalan ne'ebé joven ida atu fila ba nia uma ho motorizada, derrepente ema deskoñesidu ho motorizada mós hana joven ida ho rama ambon kona nia kabun parte sorin los. Membre F-FDTL ida mak hetan fali joven ne'e ho kondisaun grave no lori ba Hospital Nasionál Guido Valadares Dili. Tuir informasaun husi Komisáriu Jerál PNTL, Komisáriu Julio Hornai iha jornal Timor Post loran 8 Agostu pájina 4 hatete katak "Arguidu na'in 9 hetan ona pena prizaun preventiva husi Tribunal Distritál Dili".

## KARATERÍSTIKA INSIDENTE


Total Insidente: Julu 2016




Insidente Fatin




See Mak Hahu / Halo Violensia?



Tipu Violensia




### Metodu Violensia




### EMA NE'E BE HAHU VIOLENSIA NIA JENERU SAIDA?




### Vitima Nia Jeneru




### See Mak Responde?



### Hun no Abut Konfliktu



### Impaktu



## ATIVIDADE PREVENSAUN NO RESPONDE BA KONFLITU

### Atividade Ne'ebé Hala'o Husi Ekipa Sistema Atensaun no Responde Sedu (AtReS)

- ▶ Insidente liga ho juventude aas iha kualkér tempu no sira involve iha insidente violénsia tanba hemu tua lanu. Ho razaun ida ne'e, Belun hamutuk ho Rede Prevenaun no Responde Konfliktu (RPRK) Postu Administrativu Baucau fasilita workshop loron ida kona-ba Alcohol no Droga. Eventu ne'e hetan apoiu husi GIZ Fundus ba Dame no Sekretáriu Estadu Juventude no Desportu (SEJD). Workshop ba juventude na'in 30 ne'e realiza iha Postu Administrativu Baucau iha loron 26 Jullu 2016.



- ▶ Iha loron 27 Jullu, Belun liu husi Sistema AtReS publika Alerta ida ho título "Belun Kondena Insidente Grave Hasoru Feto no Labarik Feto Ne'ebé Akontese Iku-Iku Ne'e". Bazeia ba rezultadu monitorizasaun Belun liu husi Sistema AtReS deteta insidente liga ho asuntu ne'e sa'e maka'as. Objetivu prinsipál husi publikasaun Alerta ne'e hodi bolu atensaun ba instituisaun kompetente sira no comunidade Timor-Leste tomak, tau matan no halo prevenaun no mós prevene atu la mosu tan iha futuru;

### Atividade Ne'ebé Hala'o Husi Ekipa Programa Apoiu Polisiamentu Komunitária (PAPK)

- ▶ Iha loron 22 Jullu 2016, Konsellu Polisiamentu Komunitária (KPK) Suku Balibar, Postu Administrativu Cristo Reí, Munisipiu Dili realiza atividade simu malu entre juventude husi Aldeia Lacoto no Aldeia Tancae ne'ebé envolve iha insidente violénsia ne'ebé akontese iha loron 15 Jullu 2016. Atividade ne'e realiza tanba kolaborasaun entre Belun, Fundasaun Azia (TAF) no fundu husi Embaixada Nova Zelândia;



- ▶ Fundasaun Asía no ONG Belun iha loron 21 Jullu 2016 asina ona akordu kontinuasaun ba PAPK ne'ebé sei remata iha loron 15 Setembru 2016. Programa ne'e hetan apoiu fundus husi Governu Nova Zelândia liu husi TAF atu observa no akompaña enkontru regular sira ne'ebé Ofisiál Polísia Suku (OPS) no Konsellu Polisiamentu Komunitária (KPK) organiza iha Munisipiu sira hanesan Dili, Likisá, Vikeké, Covalima no Manufahi.



### Atividade Ne'ebé Hala'o Husi Ekipa Mediasaun no Rezolusaun ba Disputa Rai (MRDR)

- ▶ Belun koopera ho Autoridade Lokál no Diresaun Terras e Propriedade Servisu Cadastrais Munisipiu Bobonaru fasilita mediasaun ba disputante (ema ne'ebé hadau malu rai) na'in rua iha Edifísio DTPSC Maliana iha loron 12 Jullu 2016. Mediasaun ne'e realiza atu ajuda parte rua buka solusaun ne'ebé dí'ak ba sira nia problema liga ba rai. Mediasaun ne'e ikus mai hetan duni konkordánsia no solusaun ba problema, no sira mós asina akordu rezolusaun disputa rai.



## KONA-BA REVISTA NE'E

Revista situasaun ne'e relata kona-ba asuntu xave relaciona ho insidente violénsia no tendénsia konfliktu husi koleasaun dadus monitorizasaun liuhosi Sistema Atensaun no Responde Sedu (AtReS), kobre iha Postu Administrativu 43, husi Postu Administrativu 65, Suku 208 iha Timor-Leste durante Jullu 2016. Belun esforsu atu fahe informasaun ne'ebé up-to-date no serteza ho dadus atuál. Hanoin katak, bele hetan mudansa situasaun ho lalais husi kontribuisaun dame ita hotu nian. Ami agradese no simu informasaun seluk ne'ebé bele klarifika ka update dadus ne'ebé ami iha, liuhosi sistema AtReS.

**Marilia Oliveira da Costa**, Jestor Sistema AtReS: [bylah.belun@gmail.com](mailto:bylah.belun@gmail.com)

**Laurensius Lein**, Especialista Prevenaun Konfliktu & Polítika: [laurensius.belun@gmail.com](mailto:laurensius.belun@gmail.com)